

第七集

粵雅堂叢書

第七集

粵雅堂藏書

焦氏筆乘卷四

秩陵焦竑弱侯輯

包改古文

六經本皆古文自唐天寶三年詔集賢學士衛包改古文更作楷書以便習讀而俗書始雜之至今則魯魚陶陰字既差訛聖體書復苟簡矣久假不歸積習成俗其奈之何哉

歲橙

上林賦歲橙若蓀李善本作歲持歲音針乃馬藍又作

魚氏筆乘卷四
寒將卽寒蔣善本蓋誤以將作持也張揖曰歲持缺故
詳具之

詩用助語

王昌齡灞池詩開門望長川薄莫見漁者借問白頭翁
垂綸幾年也二韻俱助語殊有致孟襄陽詩所居最幽
絕所住皆靜者依止此山門誰能效某也亦瀟灑可喜
他若山如仁者壽風似聖之清大類學究口吻不足言
詩矣

移中監

論衡云孝明之時讀蘇武傳見武官名曰移中監以問百官莫知夫倉頡之章小學之書備具木旁多文字且不能知欲其及董仲舒之知重常劉子政之知貳負難哉

定襄伯能詩

定襄伯郭登鎮大同廉而尙謀有古良將風已已之變力守邊疆大小十數戰設飛天網攪地龍等法發其機頃刻數里皆陷砲一發五百步顧又嫺文學所著左傳解可與杜武庫爭衡嘗記其二詩哀征人云天迷離水

鳴咽戰馬無聲寶刀折冤鬼慘酸啼夜月青燐熒熒明
又滅照見征夫戰時血客中春晚云遠塞書難寄空庭
花自開舊巢雙燕子今歲不曾來噫登以勇將而兼儒
雅若此卽韋孝寬薛仁貴何以過之

周文襄

周文襄公忱巡撫江南凡二十三年督理歲漕鑄鐵量
定支撥減重額稽羨餘立綱運處蘇揚鹽利計賑濟脩
圩塍疏水利均加耗以舒貧乏置編圉以革逋欠立改
兌以省舟費建倉廩以便搬貯處草折以易輸送定金

花以抵京俸起布式以釐奸僞收帶徵以禁馬頭皆鑿
鑿垂百世之利然公謀慮深長善采眾論故能就此聞
其巡歷時嘗去騶從入田野閒與村夫野老相語問民
閒疾苦每坐一處使聚而言之唯恐其不盡也

讀書不識字

宏甫爲南比部郎日聚友講學寮友或謂之曰吾輩讀
書義理豈有不明而事講乎宏甫曰君輩以高科登仕
籍豈不讀書但苦未識字須一講耳或怪問其故宏甫
曰論語大學豈非君所嘗讀邪然論語開卷便是一學

魚氏筆彙卷四
三
字大學開卷便是大學二字此三字吾敢道諸君未識
得何也此事須有證驗始可如識論語中學字便悅樂
不愠識大學二字便定靜安慮今都未能如何自負識
得此字耶其人默然不能對

陳遇今之子房

陳遇字中行金陵人博學有治才太祖定金陵以御史
秦元之薦卽召見上禮之甚稱先生而不名日侍幃幄
坐久必賜宴命廢馬送歸車駕凡三幸其第先生竭心
攄悃所獻替悉保國安民至計授翰林學士者再固辭

嘗奉密命至浙江還奏稱旨授禮部侍郎又固辭會疾
醫療踵至病愈入謝上望見連呼君子君子除禮部尙
書又固辭自是不煩以務但從容燕見談說經史古今
成敗而已有被譴者力爲解上每聽之欲官其子亦不
受年七十二卒賜賻祭加東園祕器眷待之隆羣臣莫
敢望噫陶宏景稱張良古賢無比蓋自況也然梁武功
業視漢高何如而以子房自待耶李韓公劉誠意勲庸
茂矣而不免於禍獨先生言行本朝而爵不得加其身
功濟蒼生而史不得泄其謀豈直一時之馮翼哉謂今

之子房可也

史癡

金陵史癡翁名忠字廷直能詩又能爲新聲樂府性豪俠不羈不喜權貴人有不合輒引去或徑以言折之不顧遇所善則留連忘懷無貴賤皆與款洽家有樓近冶城扁曰卧癡中列圖史敦彝位置雅潔有酒餽引客笑談呼盧其中不醉不已然翁飲輒醉醉則按拍歌新詞音吐清亮旁若無人有姬何名玉仙號白雲道人聰慧解篆書居常以文字相娛樂甚適也有時出遊輒附舟

而行不告家人所往女笄當嫁婿貧不能具禮翁詭攜
觀燈同妻送至婿家取笑而別年踰八十預命發引已
隨而行謂之生殯其達生玩世如此善作畫不拘家數
縱意作山水樹石清潤紛錯天機渾成大率以韻勝得
其片紙者皆藏去以爲寶余友盛仲交嘗輯翁遺詩同
金元玉詩爲一帙題曰江南二隱惜未能板行耳

顧清甫

金陵顧居士名源字清甫少豪雋不羣詩書畫皆不泥
古法信筆點染天趣迴絕然實自古法中來一日與余

論書曰書須古法四分已意六分乃妙不然縱筆筆能
似古人終成奴書不足貴也中年究心禪理大有悟入
然未嘗以得理而薄脩因晚節與名僧舉西方社會戒
律精嚴無與爲儷臨終端坐而瞑舉室聞蓮花香三日
始歇居士嘗手書數絕句貽余今筆於此十箇蒲團九
箇穿誰家枯井雪難填而今法法成三昧聲色無妨到
耳邊松火炊羹烟滿衣雪寒豪士古長饑明珠不換黃
蘂甕涕吐光爭日月輝鼎食何人曉夜忙全機隨處好
參詳漁竿不負秋如錦兩岸黃花撲棹香短褐長鑱老

石門蔬盤容易度朝昏百年智巧消磨盡慚愧人傳粉
墨痕腕上雙刀照雪花少年曾醉魯朱家揣摩未展男
兒志頭白都門學種瓜雪屋寒蘊有歲華黃金過斗未
須誇若言竹帛功難朽也是空添眼上花藤葉青莎稱
體長菊花新酒滿瓢香時人若訪龐居士萬樹雲蘿護
草堂布髮曾爲授記人草衣隨處屬閒身十年朋舊塵
勞破香火同酬野寺春雲裏青山古檜叢枝柯如屋蔽
霜風男兒有志投蹤跡銚鉢依稀在手中

點朝班

子美幾同青瑣點朝班用脩謂點讀如玷漢書祇足以發笑而自點耳與此點字同余謂不然若作玷字不得用幾同字王建詩殿前傳點各依班召對西來八詔蠻蓋唐人屢用之亦可證杜詩之不音玷矣

摩詰見地超然

子瞻云子美詩王侯與螻蟻同盡歸邱墟願聞第一義迴向心地初知其文字外別有事在然子美亦偶及此耳要非本色必也其摩詰乎觀魏居士書胡居士三詩可謂妙絕如卽病卽實相趨空定狂走無有一法真無

有一法垢又因愛果生病從貪始覺貧又何津不鼓棹
何路不摧輶非其見地超然安能鑿空道此

杜詩無一字無來處

山谷謂杜詩無一字無來處今試拈一二如驥尾蕭蕭
朔風起用漢天馬曲眼有紫焰雙瞳方用馬經語儒術
於我何有哉用崔祥語孔邛盜跖俱塵埃用阮兢語詩
卷長留天地間用劉楨語深山大澤龍蛇遠用左氏語
遠山却畧羅峻屏用孫綽語十日不一見顏色用江淹
語青鞋布襪從此始用謝元暉語青袍白馬更何有用

庾信賦語舟人漁子入浦澈用海賦語關中小兒壞紀
綱用梁到溉語十年厭見旌旗紅用角里先生語文采
風流今尙存用羊祜語丈夫蓋棺事始定用劉毅語明
年此會知誰健用阮瞻語不分桃花紅勝錦用漢李夫
人語卽今耆舊無新語用張湛語陶冶性靈存底物用
鍾嶸語一談一笑俗相看用王遇元語鄰雞野哭如昨
日用張禹語聊舉一隅不可殫述

秦城

三輔黃圖長安故城城南爲南斗形城北爲北斗形故

號斗城何遜咸陽詩云城斗疑連漢老杜秦城近斗杓
秦城北斗邊北斗故臨秦皆用此而秦中詩春城依北
斗郢樹發南枝春無義且不可對郢當是秦城耳

綠沈

綠沈設色名猶今所謂沈水色耳宋人詩話解杜詩乃
謂甲拋於雨爲金所鎖鎗卧於苔爲綠所沈此何等語
邪南史隋文帝嘗賜張繡以綠沈之甲薛氏遂以綠沈
爲精鐵陸龜蒙竹詩一架三百竿綠沈森杳冥趙德麟
遂以綠沈爲竹皆誤也